

## 叙

客有問於余曰譜何自昉乎余曰昔劉向校書天祿之餘撰世本二卷此譜之始也洎乎晉摯虞為尚書郎復有族姓昭穆十卷此譜之繼也迨其後諸名家譜帙林立惟歐陽氏蘇氏兩家乘卓絕千古彼蓋其人足傳其文亦足傳後此者安敢媲美乎客曰今譜之修既不敢媲美於古人然則爾何敢怛然妄為乎余曰余非敢妄也蓋我祖仍禎公自洪武二年由江西吉安府吉水縣移居石門瓜子峪迄今五百餘年未曾修譜而其間人文蔚起子孫繁衍或居於天池堰或樓於松林峪或舍於樟木崗或遷於皂角市雲散星居後裔之布滿於四方者不知凡幾以故生齒日益繁矩度日益軼余賞見乎子孫冒祖父之諱而弗知姪弟竊伯長之名而罔忌甚至角詐力而親疎之誼已混逞機械而尊卑之分莫辨余念及此能無隱然神傷也哉是年春三月清明節余來祠祀祖見有父老子弟及各房族長偶談及序談一事因以相商於余余遂欣然喜曰是吾夙志也但余才疎學淺不敢專任其事願諸公贊成焉眾皆曰善苟能是誠我族之光也於是同議每房各立房長共採丁名查明山塋有碑無碑合載譜內已歿未歿悉列派中俾後世子孫一見了然庶不致以子孫而冒祖父之諱以弟姪而竊伯長之名而且親疎之誼莫混尊卑之分亦明矣則所以啟本致肅者在此所以篇親修睦者在此有所

以光乎前裕乎后者亦在此譜所關豈淺鮮哉不然冒冒罔稽將年  
愈远而祖愈失裔益繁而派益紊而人道從此絕矣子何以妄律我  
乎客於是撫然謝曰禮云尊祖故敬宗敬宗故收族爾其知之矣

後裔孫元魁星齋謹譔